



Uunga siunnersuut: Nappaatit tunillaassortut akiorniarlugit iliuitsit pillugit Inatsisartut peqqussutaata allangortinneqarnera pillugu Inatsisartut inatsisissaat nr. xx, xx.xxx-imeersoq. (Tunillaassuinerup pinaveersaartinniarnernani siaruarnaveersaartinniarnernanilu aamma sullissiniarnermi pisariaqartitat il.il. qulakkeerniarnernanni iliuseqartoqarsinnaanermut annertusaaneq)

(Isumaginninnermut Inatsisinillu Atuutsitsinnermut Naalakkersuisoq)
(Siullermeerneqarnera)

Siullertut nunatsinni innuttaasunut qujarusuppunga. Qaaqquneqarnikuunngitsumik pulaartoqarpugut massakkorpiarlu nunarsuarmi napparsimatitseqisumik, akiorniarnernanullu ataatsimoortariaqarpugut. Ataatsimoorluta corona-virus akiorniartariaqarparput.

Ulluinnarni inuunerput allangorsimaqaaq. Angerlarsimaffigut qimaqqusaanngilagut. Meeqqagut atuariatoqqusaanngillat. Immitsinnut 2 miiteri ataallugit qanilleqqusaanngilagut. Annerpaamik inuit 10-liulluta ataatsimooqqusaavugut, allarpassuillu.

Ullumi Inatsisartuni ataatsimoorpugut ullorlu ataasiinnaq atatsimiittussaavugut nappaatit tunillaassortut akiorniarlugit iliuitsit pillugit Inatsisartut peqqussutaata allangortinneqarnissaanut naleqqussaaneq pisariaqavissoq akueriniarlugu, imatullu oqareerlanga:

Allanguutissatut siunnersuutigineqartut malillugit tamat oqartussaaqataanerata iluani akuerineqarsinnaasup killinga tikissimalerparput. Sammisamilu ataatsimi killinga qaangersimavarput. Tamanna uterfigissavara.

Siullertulli nunarsuaq tamaat sukannersumik naalakkersorneqarnerup nalaanimmat paasisariaqarparput. Sulimi coronamut peqqissarnissamut iliussissanik imaluunniit kuppilersissummik nassaartoqanngilaq. Taamaammallu virus suli tuniluuttuarpoq, inuillu tuusintilikkuutaat toqussutigisimavaat. Massakkorpiag Italia Spanialu sakkortuumik eqqorneqasimapput, maanngaanniillu nunarsuarmi inuiaat misiginneqatigalugit nalunaarutigissavarput.

Nunat assigiinngitsut periusissianik assigiinngitsunik misileraasaqattaarput. Sulilu periusissiaq eqqortoq nassaarineqarsimanngilaq. Nunatsinni Europami nunat allat issuapajaarniarlugit aaliangersimavugut, taamaalillutalu nunarput matusimavarput. Inuussutissarsiortunut aningaasatigut ikiutissiat arlaqartut naalakkersuinikkut akuerereersimavagut, Demokraatiniillu erseqqissarusupparput partiit AKISUSSAASSUSILLIT INOOQATIGIINNERMULLU PINGAARTITALLIT tamarmik ikiutissianut akuserseqataasimmata. Tamatumunnga qujarusoqaanga.



Corona-virusi tuniluutipallattorjuuvoq nunatsinnilu peqqinnissaqarfimmut artukkiisorujunngorsinnaalluni. Malitsigisinnaasai siumut isigineqareersinnaanngitsunik sakkortusinnaasunillu kingunekaratarsinnaapput, taassumallu kingunerisaanik tamatta asasatsinnik annaasaqarsinnaavugut. Tamanna kialluunniit piumannigilaa. Taamaammallu annertuumik sakkortuumillu iliuseqarnikkut virusi akiorniartariaqarparput. Tunillaassuineq unitsinniarlugu nukigut tamaasa atortariaqarpagut. Tamannalu ajoraluartumik isumaqaratarsinnaavoq inuit inatsisitigut illersugaanerannik pingaartitsisuunitsinni eqqortoq tulluarterlu unioqqitinnissaanut killinga qanillattorsinnaalersinnaagatsigu.

Peqqussut matumuuna sammineqartoq akuerineratigut Naalakkersuisuisut (oqartussaasut) pinngitsaaliillutik peqqissaasinnaannissaannut aammalu pinngitsaaliillutik kuppilersuisinnaanngornissaannut pisinnaatilissavagut. Alloriarneq taamaattoq sakkortuvoq, iliutsilli taamaattut aatsaat ajornartuuiffimmi imaluunniit allanik aqutissaarunnermi atorineqarnissaat Demokraatinit pingaartipparput. Isumaqarpugut tamanna siunnersuummut isumaliutissiisummi aalajangerneqassasoq. Tunillaassuinerli unitsinniarlugu taamaaliornissaq pisariaqarsinnaavoq, taamaalinikkullu inuit inuunerannik annaassisinnaanngorsinnaavugut. Taannarpiaq peqqutigalugu siunnersuummi tassunga tungasoq akuerisinnaavarput.

Allartikkama eqqaavara siunnersuut sammisami ataatsimi ingasattajaarpallaartoq. Tassani pivara § 6, imm. 2, imatut oqaasertaqartoq:

(Issuaavunga)

“Naalakkersuisut malittarisassanik aalajangersaasinnaapput eqqartuussiviit akuersiseqqaarnagit imm. 1-imi aalajangersakkat malinneqarneri nakkutiginiarlugit ininut allanullu isertoqarsinnaaneranut tunngasunik nakkutilliinissaq siunertaralugu.”

(Issuaaneq naavoq)

Demokraatit isumaqarput inuit ataasiakkaat piginnittussaataanerat innarlerneqassanngitsoq. Naalakkersuisut politiilluunniit inuttagit nakkutiginiarlugit inuinnaap angerlarsimaffianut iseniarunik eqqartuussivimmiit akuersisummik peqqaartariaqarput. Peqqussutip allanngorneratigut iliutsimit tunngaviusumit saneqqutsisinissaq Demokraatit periarfissaasorinngilaat.

Taamaammallu kissaatingarput Naalakkersuisut aappasaaniinnginnerani § 6, imm. 2-p peerneqarnissaanut allannguutissatut siunnersuuteqassasut.

Naggataatigullu oqaatigerusuppara matumuuna siunnersuutip atorunaarfissaa ilanngunneqarsimammat Demokraatinit naammagisimaaratsigu, oqareernittuummi iliussissat ilaat annertoqimmata.

Immissinnut qanillinaveersaarnissarsi eqqaamassavarsi, immissinnullu paaralusilu, periarfissaqarussilu arlaatigut ikiuunnarisi. Nunarsuaq tamaat ajornartoornermit nalaanneqarpugut, piffiillu ilaanni ajunaarutaasimaqaaq. Ataatsimoorluta tuniluussorneq unitsinniartigu, nunatsinni ajunaarner-suarmik



kinguneqarnissaa pinaveersaarniarlugu.

Taamatut oqaaseqarlunga siunnersuut aappassaaniinginnerani Inatsisinut Ataatsimiititaliamut innersuuppara.